



قصيدة الشيخ ناصر أمام خادم الحرمين

يا هاجس أفكار القضايد حانت الوقفه تعال
وأنا أعرفك ما تخلف الهقوه ولا تنسى الوعد
واليوم موقفنا كبير ولا يبى غير الجزال
ما عاد فيها يا قصيدي غير وقف واجتهد
قم واحتزم بي واعتبرني فالشدايد راس مال
وهات البيوت النادرات إلي معانيها جدد
سلام تسليمه وفا ترقى على روس الجبال
تسليمه ما كنها إلا البرق لحن الرعد
ويا مرحبا يا خادم البيتين زيزوم الثقال
باسم المليك الوافي المقدم قايدنا حمد
ترحيبة ما كنها إلا الكيف من صفر الدلال
ولا هيب تحصى بالرقم ولا يجاريها عدد
يا شامخ إلي بالمكارم والفعائل والخصال
رقيت فوق طويق وجبال السروات وأحد
أهدافك الوحد ونبذ التفرقه والانفصال
حتى ملكت قلوب من حولك وعاشوا في رغد
يا لي جمعت الطيب كله طيب راس وطيب فال
يا لنادر إلي في نهار الضيق تاقف وتحشد
يا لقايد إلي دون دارك تاقف قروم الرجال
وتحمي وطنها بالسيوف وتفتديها بالجسد
ما دامها ديرة هل العوجا كريمين السبال
تبشر بوقوفات الرجال إلي تبشر بالسعد
وحنا بلد واحد وتربطنا العلاقة والوصال
ومن بيننا حب وموده واتفاقات وعهد
حنا لكم وأنتولنا وقت المعارك والنزال
يشهد لنا التاريخ فالماضي وفالحاضر شهد
شعارنا ما بيننا شكه ولا فينا جدال
ونبقى وتبقى ديارنا بالعزم رفوعه عمد
هذا كلام الصديق لا جا للحكي دور ومجال
لا صار قدام الملووك إلي لنا ذخرو سند
لا صار قدامك يا خونوره رفعت لك العقال
ولا صار قدامك يا خونوجلا بوقف واستعد
يا قيادة الأمجاد يا فخر العرب في كل حال
ويا قدوة شعوب الوفا لا جا الكلام المعتمد
يا لحاكمين العادلين بشرع ربي ذو الجلال
يا لي لطاريكم جميع الناس تشكر وتحمد
الله يحفظ دياركم من شر دورات الليال
والله يضد أهل الغدر وأهل الحكي وأهل الحسد
أقولها وأعيدها وقفه وسطوه واعتدال
واثبت الأقوال بالأفعال تثبيت الوتد
لكن قبل ما ختم كلامي ودي أضرب لي مثال
من عاش في عز البلد .. يحرض على عز البلد

ناصر بن حمد آل خليفة - 2010/4/12

